

## GENESIS 5,1 – 7,24

5<sup>1</sup> Hic est liber generationis Adam. In die qua creavit Deus hominem, ad similitudinem Dei fecit illum. <sup>2</sup> Masculum et feminam creavit eos, et benedixit illis : et vocavit nomen eorum Adam, in die quo creati sunt. <sup>3</sup> Vixit autem Adam centum triginta annis : et genuit ad imaginem et similitudinem suam, vocavitque nomen ejus Seth. <sup>4</sup> Et facti sunt dies Adam, postquam genuit Seth, octingenti anni : genuitque filios et filias. <sup>5</sup> Et factum est omne tempus quod vixit Adam, anni nongenti triginta, et mortuus est. <sup>6</sup> Vixit quoque Seth centum quinque annis, et genuit Enos.

.....

Et vixit Mathusala, postquam genuit Lamech, septingentis octoginta duobus annis, et genuit filios et filias. <sup>27</sup> Et facti sunt omnes dies Mathusala nongenti sexaginta novem anni, et mortuus est. <sup>28</sup> Vixit autem Lamech centum octoginta duobus annis, et genuit filium : <sup>29</sup> vocavitque nomen ejus Noë, dicens : Iste consolabitur nos ab operibus et laboribus manuum nostrarum in terra, cui maledixit Dominus. <sup>30</sup> Vixitque Lamech, postquam genuit Noë, quingentis nonaginta quinque annis, et genuit filios et filias. <sup>31</sup> Et facti sunt omnes dies Lamech septingenti septuaginta septem anni, et mortuus est. Noë vero cum quingentorum esset annorum, genuit Sem, Cham et Japheth.

.....

Videns autem Deus quod multa malitia hominum esset in terra, et cuncta cogitatio cordis intenta esset ad malum omni tempore, <sup>6</sup> pœnituit eum quod hominum fecisset in terra. Et tactus dolore cordis intrinsecus, <sup>7</sup> Delebo, inquit, hominem, quem creavi, a facie terræ, ab homine usque ad animantia, a reptili usque ad volucres cæli : pœnitet enim me fecisse eos.

<sup>8</sup> Noë vero invenit gratiam coram Domino. <sup>9</sup> Hæ sunt generationes Noë : Noë vir justus atque perfectus fuit in generationibus suis ; cum Deo ambulavit. <sup>10</sup> Et genuit tres filios, Sem, Cham et Japheth. <sup>11</sup> Corrupta est autem terra coram Deo, et repleta est iniquitate. <sup>12</sup> Cumque vidisset Deus terram esse corruptam (omnis quippe caro corruperat viam suam super terram), <sup>13</sup> dixit ad Noë : Finis universæ carnis venit coram me : repleta est terra iniquitate a facie eorum, et ego disperdam eos cum terra. <sup>14</sup> Fac tibi arcam de lignis lævigatis ; mansiunculas in arca facies, et bitumine linies intrinsecus et extrinsecus. <sup>15</sup> Et sic facies eam : trecentorum cubitorum erit longitudo arcæ, quinquaginta cubitorum latitudo, et triginta cubitorum altitudo illius. <sup>16</sup> Fenestram in arca facies, et in cubito consummabis summitatem ejus : ostium autem arcæ pones ex latere ; deorsum, cœnacula et tristega facies in ea. <sup>17</sup> Ecce ego adducam aquas diluvii super terram, ut interficiam omnem carnem, in qua spiritus vitæ est subter cælum : universa quæ in terra sunt, consumentur. <sup>18</sup> Ponamque foedus meum tecum : et ingredieris arcam tu et filii tui, uxor tua, et uxores filiorum tuorum tecum. <sup>19</sup> Et ex cunctis animantibus universæ carnis bina induces in arcam, ut vivant tecum : masculini sexus et feminini. <sup>20</sup> De volucribus juxta genus suum, et de jumentis in genere suo, et ex omni reptili terræ secundum genus suum : bina de omnibus ingredientur tecum, ut possint vivere. <sup>21</sup> Tolles igitur tecum ex omnibus escis, quæ mandi

possunt, et comportabis apud te : et erunt tam tibi, quam illis in cibum. <sup>22</sup> Fecit igitur Noë omnia quæ præceperat illi Deus.

7 <sup>1</sup> Dixitque Dominus ad eum : Ingredere tu et omnis domus tua in arcam : te enim vidi justum coram me in generatione hac. <sup>2</sup> Ex omnibus animantibus mundis tolle septena et septena, masculum et feminam : de animantibus vero immundis duo et duo, masculum et feminam. <sup>3</sup> Sed et de volatilibus cæli septena et septena, masculum et feminam : ut salvetur semen super faciem universæ terræ. <sup>4</sup> Adhuc enim, et post dies septem ego pluam super terram quadraginta diebus et quadraginta noctibus : et delebo omnem substantiam, quam feci, de superficie terræ. <sup>5</sup> Fecit ergo Noë omnia quæ mandaverat ei Dominus. <sup>6</sup> Eratque sexcentorum annorum quando diluvii aquæ inundaverunt super terram. <sup>7</sup> Et ingressus est Noë et filii ejus, uxor ejus et uxores filiorum ejus cum eo in arcam propter aquas diluvii. <sup>8</sup> De animantibus quoque mundis et immundis, et de volucribus, et ex omni quod movetur super terram, <sup>9</sup> duo et duo ingressa sunt ad Noë in arcam, masculus et femina, sicut præceperat Dominus Noë. <sup>10</sup> Cumque transissent septem dies, aquæ diluvii inundaverunt super terram. <sup>11</sup> Anno sexcentesimo vitæ Noë, mense secundo, septimodecimo die mensis, rupti sunt omnes fontes abyssi magnæ, et cataractæ cæli apertæ sunt : <sup>12</sup> et facta est pluvia super terram quadraginta diebus et quadraginta noctibus. <sup>13</sup> In articulo diei illius ingressus est Noë, et Sem, et Cham, et Japheth filii ejus ; uxor illius, et tres uxores filiorum ejus cum eis in arcam : <sup>14</sup> ipsi et omne animal secundum genus suum, universaque jumenta in genere suo, et omne quod movetur super terram in genere suo, cunctumque volatile secundum genus suum, universæ aves, omnesque volucres, <sup>15</sup> ingressæ sunt ad Noë in arcam, bina et bina ex omni carne, in qua erat spiritus vitæ. <sup>16</sup> Et quæ ingressa sunt, masculus et femina ex omni carne introierunt, sicut præceperat ei Deus : et inclusit eum Dominus deforis.

<sup>17</sup> Factumque est diluvium quadraginta diebus super terram : et multiplicatæ sunt aquæ, et elevaverunt arcam in sublime a terra. <sup>18</sup> Vehementer enim inundaverunt, et omnia repleverunt in superficie terræ : porro arca ferebatur super aquas. <sup>19</sup> Et aquæ prævaluerunt nimis super terram : opertique sunt omnes montes excelsi sub universo cælo. <sup>20</sup> Quindecim cubitis altior fuit aqua super montes, quos operuerat. <sup>21</sup> Consumptaque est omnis caro quæ movebatur super terram, volucrum, animantium, bestiarum, omniumque reptilium, quæ reptant super terram : universi homines, <sup>22</sup> et cuncta, in quibus spiraculum vitæ est in terra, mortua sunt. <sup>23</sup> Et delevit omnem substantiam quæ erat super terram, ab homine usque ad pecus, tam reptile quam volucres cæli : et deleta sunt de terra. Remansit autem solus Noë, et qui cum eo erant in arca. <sup>24</sup> Obtinueruntque aquæ terram centum quinquaginta diebus.